

Mbracià ite per l'ultimo iede

"L'ultimo abbraccio della montagna" ie l titul dl liber che trata dla vita de Karl Unterkircher, scrit da Silke Unterkircher deberieda cun Cristina Marrone



L liber sun Karl Unterkircher.

Persones - Nstadi ai 20 de mei iel uni prejentà ufizialmènt tla Cesa de Cultura de Sëlva l liber sun Karl Unterkircher "L'ultimo abbraccio della montagna". L'avventura estrema di Karl Unterkircher.

Ai 15 de lujio 2008 fova mort tragicamènt Karl Unterkircher, alpinista cunesciù a livel mundiel,



Silke cun Alex.

tuman ju te na sfènta de dlacier dl Nanga Parbat, la nona piza plu auta dl mond. L ti vèn nce dit da pert dla jënt dl post, i himalayans, "l maiajënt" per gauja dla truepa vites che l se à tèt danter i arpizadèures profesciunisc, danter chisc nce l fra de Reinhold Messner. La maledizion dl Nanga Parbat, l crèp "maiajënt", la storia de na desgrazia che à tucà duc, duta la Talia, ma nia mè.

"Nëus son nasciui y n di messerons muri"

"Nëus son nasciui y n di messerons muri. Danterite iel la vita. Ie la tole sciche n sucrit per chël che deguni de nëus ne à la tle. Son tla mans de Die...y canche l chërda.... pona messons jì." Chèstes ie la paroles sotes ora dl diare de Karl. Les desmostra che per el fova la vita na scincunda y nia zeche de logich y l fova cuscint che n di sarà dut finà.

Karl à abù na vita curta ma ntensiva y la pascion per l ji a crèp l à fat diventé un di alpinisc plu cunesciui dl mond; el ulova for ji a crèp iló ulache mo deguni ne fova ruvei su. Truepa vies tla

Dolomites, n pert nce bëndebò ries, à si inuëm. Dala Elpes uzidenteles ala Andes dl Sudamerica, dlonch òvel arpizà la pizes plu autes.

L nvit ala spedizione de iubileum dl K2 tl 2004 ne se òvel nia lascià mucé. Zënza esperienza n con' de arpizedes de 8.000 iel stat bon de arpizé zënza bombules d'aria l K2 y l Mount Everest te n tèmpe de mè 63 dis. Chèsta arjonta ora dl normal l à fat diventé un di alpinisc estrems plu cunesciui y ti à judà a ruvé ite tl liber di recoré.

La prejentazion dl liber

"L'ultimo abbraccio della montagna", chësc l titul dl liber sun la vita de Karl, scrit per talian da Silke Unterkircher cun Cristina Marrone y che ie uni prejentà nstadi. Tres la sèira à menà la doi autores ntèses. L ie uni liet dant plu pertes ora dl liber y mustrà tòc curc de films dla spedizione.

L ie nce uni nvià ite plu ghesé, companies de lèur y de spedizione, che à cuntà dla vita de Karl, na persona scèmpla cun n gran cuer per si familia, per i mutons dl Tibet y de si gran pascion, i crèps. L liber scumència cun la cunteda dla spedizione dl Nanga Parbat, coche l ie unit a s'l dé la dezijion de fé l paréi Rakhiot, i pensieres de Karl la sèira dan pié via, l viac de viers dl Nanga Parbat, i dis tl ciamp de basa, l aspitè giut sun l dré tèmpe y la desgrazia descrita da Walter Nones y Simon Kehrer a Silke.

Do l film "Karl", premià plu iedesc tl mèns de auri passà pra l Filmfestival de Trènt, ie l liber da sèn inant da cumpré te duta la butèighes de libri. L liber ie uni scrit dala compania/fèna de Unterkircher, Silke, per lecurdè l alpinista y uem mort tragicamènt l ann passà. Chësc liber conta la storia de Karl Unterkircher y si raport sot che l ova cun i crèps: la Dolomites



Karl Unterkircher.

ulache el ie nasciù y chersciù su y cun l Himalaya ulache l à abinà l senificat sot dl alpinism estrem. La usc che conta ie chëla de Silke Unterkircher, compania de Karl per 12 ani, cun el à abù trèi mutons. Ma tl liber iel nce lecorc de companies che jiva a crèp cun Karl, coche nce pertes dl diare de si spedizions.

L crèp che chërda

"Cie à pa purtà Karl y si companies alpinisc a ndesfidé chëi parèies tan riei da arpizé?" - pössen liejer tla prejentazion dl liber. Cie l sburdla pa a cri na ndesfidada tan periculèusa? Te chësc cuntribut apasciunà al pere de si trèi mutons nes juda Silke a capì che suvènz do de tel dezijions tan periculèuses ne se ascuend nia n dejidere de

afermazion, ma n sentiment defin fulestier a chiche ne cunesc nia la magia dl'esplorazion. Ajache, coche dijova Karl, l ne n'ie nia i alpinisc a cri la risia, l ie l crèp che chërda.

L liber ie uni dat ora da Rizzoli y ie uni scrit a cater mans, deberieda cun la giornalista dl Corriere della Sera Cristina Marrone che ie duturèssa de criminologia y specialiseda te cronica foscia. L liber à 250 plates y ie da cumpré tla butèighes dai libri al pries de 18,50 euro.

Da lecurdè iel che ai 15 de juni 2009 unirà ora n auter liber sun Karl Unterkircher, scrit dai doi companies de spedizione sun l Nanga Parbat, Simon Kehrer y Walter Nones.

Daniela Villotti